

Son Raeuz Baenzlawz Guh Vunz

——Doeg 《Dienhvah Geizgvaiq》Ngeixdaengz

□ Guj Gyah / 古佳

Youq gwnzbiengz, miz yiengh vunz ndeu cungj nyinhnaeuz bonjfaenh yienghyiengh ndei, bonjfaenh yienghyiengh ak. Yiengh vunz neix guh saeh couh cungj lau vunz mbouj rox, gag nyinhnaeuz swheij guh saeh couh itdingh aeu vunz rox, maqmuengh bouboux cungj naeuz de baenz, bouboux cungj naeuz de ak. Yiengh vunz neix yawj mbouj ndaej vunz ak gvaq de, yawj mbouj ndaej vunz ciemq de.

Doeg le bi 2020 ndwen 6 ngoenz 17 《Gvangsih Minzcuз Bau》(Banj Sawcuengh) banj daihngaih bien faenzcieng 《Dienhvah Geizgvaiq》le, gou gag naemj daengz aen dauhleix ndeu, aen dauhleix de couh dwg: Son raeuz baenzlawz guh vunz.

Ndaw faenzcieng sij daengz song aen “dienhvah geizgvaiq” hawj bousij mbouj rox baenzlawz guh cij ndei, gij saeh yienghneix bousij mbouj miz banhfap bae guh, hix guh mbouj ndaej, mbouj dwg dan bousij guh mbouj ndaej, bouslawz hix guh mbouj ndaej, bouslawz hix mbouj miz banhfap bae guh. Gaijgez yiengh saeh neix, cij miz bous dwk dienhvah de gag guh, couh dwg aenvih miz bous dwk dienhvah yiengh vunz neix cij miz yiengh saeh neix okdaeuj.

Aen dienhvah daih’ it: Bous vunzcaiz bouscoz mizmingz ndeu “yaek sinhcingj buqlaeh dang fu gyausou, baihgwnz saemj gvaq caizliuh de le, nyinhnaeuz diuzgen de caengz hab geijlai, couh mbouj baecinj, de laih dwg baihgwnz hozgenz de miz dungxcaiz lai, daegdaengq aeu gaemh’ at de”.

De siengj heuh bause youq gwnz bauqcej daengh gij saeh neix okdaeuj.

Youq neix raeuz mbouj gangj bause miz mbouj miz aen gienz neix, raeuz rox bause dwg aen congheung hawj vunz roxyiuj sienh yak, yawjraen ndei rwix. Gienh saeh bouscoz mizmingz neix, guh ndaej deng mbouj deng, gag miz aen bumwnz he bae guenj, gag miz gyoengq bingzvej daeuj bingznaeuz. De baez dingq daengz bousij naeuz guenj mbouj ndaej, couh “hozgaek lo”. Doeklaeng “bous lauxsae coз okmingz neix seizneix gaenq mbouj ndaej dingqgangj lo”. Vihmaz ni? “Aeu vah raeuz daeuj gangj, couh dwg bous vunz neix mbouj rox guh vunz”.

Aen dienhvah daihngaih: Goenglaux bousij ndeu naemj youq ndaw bause “daj ndaem cawz yak”, aenvih “duenh seizgan neix faenzcieng de yungh noix di, de nyinhnaeuz dwg boubien luenh yungh gienz, dan yungh faenzcieng vunzsug, mbouj yungh faenzcieng de”.

Yawj daengz gizneix gou raen doeksaet youh raen ndeiri, bause yungh mbouj yungh faenzcieng roxnaeuz noix yungh gij faenzcieng raeuz, raeuz aeu ndeindei bae naemj dwg maz yienzaen, lumj-baenz raeuz sij ndaej ndei mbouj ndei, sij ndaej hab mbouj hab aen seiqneix, lumjbaenz faenzcieng daiqlai caengz yungh daengz gij faenzcieng raeuz, lumjbaenz gaenq baiz banj le yaek daengh okdaeuj daengjdaengj. Bause yungh mbouj yungh gij faenzcieng raeuz, aeu ginggvaq boubien、

bous cungbien daengj lai gap saemjdingh cij ndaej gietdingh hab mbouj hab yungh、seizlawz cij hab yungh, gauq bause mbouj yungh gij faenzcieng swheij, couh lumj gaemh daeglwg vunz aeu dahlwg raeuz bae guh bawx nei, swheij gag longh ciemh swheij, swheij gag sik naj swheij.

Caiq gangj, dawz bause mbouj yungh roxnaeuz noix yungh faenzcieng swheij gienh saeh neix caeuq “daj ndaem cawz yak” rangh hwnjdaej, vihmaz couh mbouj naemjnaemj swheij couh-dwg vunz ndaem、vunz yak ni? Bause miz gienz yungh mbouj yungh gij faenzcieng raeuz, raeuz miz maz gienz gaemh bause itdingh aeu yungh gij faenzcieng raeuz? Bousij aeu gienh saeh de sij 10 bien fat okbae cij ndaej daengh 3 bien, daeuj lwnh hawj raeuz: Raeuz mbouj ndaej gaemh bause yungh gij faenzcieng raeuz.

Gou gag naemj, gij goj ndaw faenzcieng neix mbouj rox dwg bousij gag naemj okdaeuj roxnaeuz caen miz gij saeh neix, gyonj daeuj gangj bousij dwg aeu song aen dienhvah geizgvaiq neix daeuj son raeuz guh vunz aeu rox dag ndang caiz buh, aeu rox rau dungx gwn haeux, mbouj ndaej fouz saeh ra saeh, mbouj ndaej cij naemj daengz swheij. Ciuq vah bousij naeuz couh dwg——

“Bousvunz mbouj rox guh vunz, caeuq vunz gangviah cungj maij dingibak, baenzlawz caeuq vunz doxyouq, baenzlawz caeuq doengzsaeh guh saeh cungj mbouj rox, cungj vunz neix baenzlawz guh ndaej bae dem?”

Fwen “Sienh” Ndaw Hagdangz

□ Banh Ningz / 潘宁

Banh daegsaek hagdangz,
Mbouj gangj ok lwedhanh;
Ciuq cwngcwz bae banh,
Ndei fanh daih lwglan.

Banh ndei hagdangz raeuz,
Caenzgya aeu doengzsim;
Gangj hengz yaek vwnzmingz,
Caencingz bae guh saeh.

Gauj hagdangz gensez,
Gaej caenh deq vunz bang;
Gij saeh lumj bya sang,
Wngdang roengzrengz benz.

Seiqvunz aeu sienhsoh,
Niemh bohmea aencingz;
Guh saeh aeu caensim,
Raen gim cungj mbouj caeg.

Guh vunz mbouj doegyak,
Haibak gaej ndaq vunz;
Danghnaeuz dwg simbwn,
Aenmbwn cungj mbouj nyiuz.

Lauxsae caen sinhoj,
Son raeuz rox dauhleix;
Raeuz yaek doegsa ndei,
Gyo’mbaiq geiq ndawsim.

Bohmea aencingz naek,
Lij laeg gvaq aenhaj;
Mizseiz de baeg naiq,
Raeuz lai guh hongranz.



Daihcaet Gwn Duzngwz

Gyanghwnz ngoenzde, mbouj, laebdaeb cibgeij aen gyanghwnz, gou cungj deng haujlai duzngwz hung gyaep haeb, gwnznamh miz duzngwz rim caez, daemh mbat yamq ndeu roengzbae, unqnemnem caemhcai raeuzradrad, ngaemgyaeuj baez yawj, youh dwg duzngwz, moix haemh cungj deng duzngwz hwk dwk daengx ndang lengxhanh. Caeklaiq baez bungz yaek saetmingh seiz, vangz-ngwz aj bak lumj aenlaep baenzneix hung haeb coh gyaueuj gou seiz, gou swenj sing ndeu, ndiu lo, an’ onj ninz youq gwnz congz.

Aen loq doxdoengz, lai baez le, gou couh gvenq lo, hix mbouj daih dawz haeujsim lo. Caenhueng youq ndaw loq deng duzngwz hung gyaep ndaej dauqcawq buetdeuz, hoeng ndawsim gou gyajgyumq rox dwg youq ndaw fangzhwnz, gaej lau, doeklaeng yaek dai seiz, swenj baez he, ndiu

•Sawcuenhraz Lwgnyez•

Gij Golwgnyez Henz Dahhoengz

□ Lanz Haijyangz Moz Beibei / 蓝海洋 莫蓓蓓

gvaqdaeuj, raen ninz youq gwnz congz, duzngwz caiq hung hix mbouj rox baenzlawz sieng gou, ndigah, laebdaeb cibgeij hwnz fangzhwnz raen duzngwz le, gou couh menhmenh lumz lo.

Lih mbouj daengz ngoenzneix youh yawjraen Aulungzgeiz gaeb duzngwz, yienznaeuz duzngwz neix beij duzngwz mbatde youq mohrin singq Linz lij iq, hoeng gij yiengh ca mbouj geijlai, aen ndang gutgungq nodning hix doxdoengz caez, yawjraen de, gou youh gag dauqcungz ngeix hwnj le baezde youq ndaw fangzhwnz deng duzngwz hwk、gyaep, baihlaeng

gou youh lumj miz raq rumzliengz bongj gvaq.

“Duzngwz neix caen biz.” Aulungzgeiz nyaenxnyaenx ndang duzngwz, gig habhoz naeuz, gou hix mbouj gamj han coenz he.

Seizneix, de gaenq aeu benq-bohliz gvej gij hoz duzngwz gvaengx he lo, gamz benqbohliz youq bak, song fwngz nyaenx giz hoz deng gvej duzngwz, menhmenh bok naeng duzngwz roengzdaeuj, daengx aen fanj okdaeuj, couh lumj seizdoeng gou duet mad nei. Gij noh daj giz hoz bok okdaeuj hausaksak, lae ok di lwed,

duzngwz haenx in ndaej buekmingh niuj, diuz rieng mboujduenh bongx geuj ndang Aulungzgeiz, yawj ndaej gou bak aj da daengx, aensim diuqbaegbaeg mbouj daengx.

Bok naeng daengz dungx de seiz, gij sing bok naeng miz di lumj gou bok naeng lwgbug, caengz naeng ngwz miz di na, caeuq noh nem dwk, seizneix nyaenx nyengh bok roengzdaeuj, caen miz di doegsieb. Yienznaeuz bingzciengz gou youh haemz youh lau duzngwz, hoeng yawjraen cungj cingzgingi neix, hix vih duzngwz neix siengsim. (caengz sat)